

四庫全書

集部

欽定四庫全書

集部

絕妙好詞箋卷一

詳校官中書

臣張姚成

侍讀臣孫球覆勘

總校官檢討

臣

何思鈞

校對官中書

臣

高 中

謄錄監生

臣

黃春暉

欽定四庫全書

集部十

絕妙好詞箋

詞曲類二 詞選之屬

提要

臣等謹案絕妙好詞箋七卷絕妙好詞宋周密編其箋則

國朝查為仁厲鶚所同撰也密所編南宋歌詞始于張孝祥終于仇遠凡一百三十二家去取謹嚴猶在曾慥樂府雅詞黃昇花菴詞選

之上又宋人詞集今多不傳併作者姓名亦
不盡見于世零璣碎玉皆賴此以存于詞選
中最為善本初為仁採摭諸書以為之箋各
詳其里居出處或因詞而考証其本事或因
人而附載其佚聞以及諸家評論之語與其
人之名篇秀句不見于此集者咸附錄之會
鶚亦方箋此集尚未脫稿適遊天津見為仁
所箋遂舉以付之刪複補漏合為一書今簡

瑞並題二人之名不沒其助成之力也所箋
多泛濫旁涉不盡切于本詞未免有嗜博之
弊然宋詞多不標題讀者每不詳其事如陸
淞之瑞鶴仙韓元吉之水龍吟辛棄疾之祝
英臺近尹煥之唐多令楊恢之二郎神非叅
以他書得其源委有不解為何語者其疏通
證明之功亦有不可泯者矣密有癸辛襍識
諸書鶚有遼史拾遺諸書皆別著錄為仁字

心穀號蓮坡宛平人康熙辛卯舉人是集成
于乾隆己巳刻于庚午鶚序稱其尚有詩餘
紀事如干卷今未之見殆未成書歟乾隆四
十六年四月恭校上

總纂官臣紀昀 臣陸錫熊 臣孫士毅

總校官 臣陸費墀

絕妙好詞箋序

絕妙好詞七卷南宋弁陽老人周密公謹所輯宋人選
本朝詞如曾端伯樂府雅詞黃叔暘花菴詞選皆讓其
精粹蓋詞家之準的也所采多紹興迄德祐間人自二
三鉅公外姓字多不著夫士生隱約不得樹立功業炳
煥天壤僅以詞章垂稱後世而姓字猶在若滅若沒間
無人為從故紙堆中抉剔出之豈非一大恨事耶津門
查君蓮坡研精風雅耽玩倚聲披閱之暇隨筆劄記輯

有詩餘紀事如千卷于是編尤所留意特為之箋不獨
諸人里居出處十得八九而詞中之本事詞外之佚事
以及名篇秀句零珠碎金擿拾無遺俾讀者展卷時恍
然如聆其笑語而共其游歷也予與蓮坡有同好向嘗
綴拾一二每自矜初獲會以衣食奔走不克卒業及來
津門見蓮坡所輯頗有望洋之歎并舉以付之次第增
入焉譬諸掇遺材以裨建章投片瓊以廁懸圃其為用
不已微乎蓮坡通懷集益猶不忘所自必欲附賤名於

簡端辭不得已因述其顛末如此云乾隆戊辰閏七夕
前三日錢唐厲鶚書於津門之古春小茨

欽定四庫全書

絕妙好詞箋卷一

宋 周密 原輯

宛平查為仁

錢塘厲鶚同箋

張孝祥

孝祥字安國號于湖烏江人紹興二十四年廷對
第一授承事郎簽書鎮東軍判官累遷中書舍人
直學士院兼督府參贊軍事領建康留守尋以荆
南湖北路安撫使進顯謨閣直學士致仕有于湖
集詞

一卷

湯衡序紫微詞云于湖平昔為詞未嘗著藁筆酣
與健頃刻即成無一字無來處

念奴嬌

過洞庭

洞庭青草近中秋更無一點風色玉界瓊田三萬頃著
我扁舟一葉素月分輝明河共影表裏俱澄澈悠然心
會妙處難與君說應念嶺表經年孤光自照肝膽皆
冰雪短鬢蕭疎襟袖冷穩泛滄溟空濶盡吸西江細斟
北斗萬象為賓客叩舷獨嘯不知今夕何夕

四朝聞見錄云張于湖嘗舟過洞庭月照龍堆金
沙盞射公得意命酒唱歌所作詞呼羣吏而酌之

曰亦人子也其坦率皆類此

崔山魏了翁跋此詞真蹟云張于湖有英姿奇氣著之湖湘間未為不遇洞庭所賦在集中最為傑特方其吸江酌斗賓客萬象時詎知世間有紫微

青瑣
哉

西江月

丹陽湖

問訊湖邊柳色重來又是三年春風吹我過湖船楊柳
絲絲拂面 世路如今已慣此心到處悠然寒光亭下
水連天飛起沙鷗一片

輿地紀勝云丹陽湖在當塗縣東南六十九里杜預注云春秋宣城縣西南有桐水出白石山西北

入丹陽是也

按景定建康志載此詞云題溧陽三塔寺按志三塔湖一名梁城湖在溧陽縣西七十里又云溧水西承丹陽湖自東壩成丹陽湖水不復通本縣界岳珂玉楮集亦云溧陽三塔寺寒光亭柱上刻張于湖詞自當以建康志為據

清平樂

光塵撲撲宮柳低迷綠鬪鴨闌干春詒曲簾額微風繡
蹙碧雲青翼無憑困來小倚雲屏楚夢不禁春晚黃
鸝猶自聲聲

菩薩蠻

東風約畧吹羅幙一簾細雨春陰薄試把杏花看溼雲
嬌暮寒 佳人雙玉枕烘醉鴛鴦錦折得最繁枝暖香

生翠帷

雲一作紅

詞旨警句盡吸西江細斟北斗萬象為賓客叩舷
獨笑不知今夕何夕念奴嬌寒光亭下水連天飛
起沙鷗一片西江月

能改齋漫錄去年今日從駕遊西苑彩仗壓金
波看水戲魚龍曼衍寶津南殿宴坐近天顏金
盃酒君王勸頭上宮花顫六軍錦繡萬騎穿楊
箭日暮翠華歸擁鉤天笙歌一片如今關外十
里未歸人前山雨西樓晚望斷思君眼此陳濟
翁薦山溪也舍人張孝祥知潭州因宴客妓有
韻此至金盃酒君王勸頭上宮花顫其首自為

之搖動者數四坐客忍笑指目者甚衆而張竟不覺也

癸辛雜識張于湖知京口王宣子代之多景樓落成于湖為大書樓扁公庫送銀二百兩為潤筆于湖却之但需紅羅百匹於是大宴合樂酒酣于湖賦詞命妓合唱甚懽遂以紅羅百疋犒之

吳禮部別集詩話于湖玩鞭亭晉明帝規王敦營壘處自溫庭筠賦詩後張文潛又賦于湖曲以正湖陰之誤詞皆奇麗警拔膾炙人口張安國賦滿江紅云千古淒涼興亡事但悲陳迹凝望眼吳波不動楚山叢碧已滇綠駿追風遠武昌雲旆連天赤笑老姦遺臭到如今留空壁邊書靜烽烟息通軺傳銷鋒鏑仰太平天子聖明無敵蹙踏揚州開帝里渡江天馬龍為匹看東南佳氣鬱蔥蔥傳千億雖間采溫張語而詞氣

亦不在其下嘗見安國大書此詞後題云乾道元年正月十日筆勢奇偉可愛

于湖詞西江月十里輕紅自笑兩山濃翠相呼
意行著脚到精廬借我繩床小住解飲不妨文
字無心更狎鷗魚一聲長嘯暮烟孤袖手西湖
歸去

范成大

成大字致能號石湖吳郡人紹興二十四年進士
孝宗時累官權吏部尚書拜參知政事進資政殿
學士提舉洞霄宮卒謚
文穆有石湖集詞一卷

醉落魄

栖鳥飛絕絳河綠霧星明滅燒香曳簾眠清樾花影吹

笙滿地淡黃月 好風碎竹聲如雪
昭華三弄臨風咽
鬢絲撩亂綸巾折
涼滿北窗休共軟紅說

朝中措

長年心事寄林扃
塵鬢已星星
芳意不如水遠
歸心欲與雲平
留連一醉花殘日
永雨後山明
從此量船載酒
莫教閑却春情

眼兒媚

酣酣日脚紫烟浮
妍暖試輕裘
困人天氣醉人花底
午

夢扶頭 春慵恰似春塘水一片縠紋愁溶溶洩洩東
風無力欲皺還休

憶秦娥

樓陰缺闌干影卧東廂月東廂月一天風露杏花如雪
隔烟催漏金虬咽羅幃暗淡燈花結燈花結片時春
夢江南天濶

霜天曉角

晚晴風歇一夜春威折脈脈花疎天淡雲來去數枝雪

勝絕愁亦絕此情誰共說惟有兩行低鴈知人倚畫

樓月

詞旨警句花影吹笙滿地淡黃月醉落魄燈花結
片時春夢江南天濶憶秦娥惟有兩行低鴈知人

倚畫樓月霜天曉角

劉克莊後村集詩話范石湖南柯子云悵望梅
花驛凝情杜若洲香雲低處有高樓可惜高樓
不近木蘭舟緘素雙魚遠題紅片葉秋欲憑江
水寄離愁江已東流那肯更西流

澄懷錄范石湖云淳熙己亥重九與客自閭門

汎舟徑橫塘宿霧一白垂垂欲雨至綠雲橋氛
翳豁然晴日滿空風景閒美無不與人意會四

郊刈熟露積如綠垣田家婦子著新衣畧有節
物挂帆邈越來溪潦收淵澄如行玻璃地上菱

花雖瘦尚可采，擷犧擢石湖。叩柴荆，坐千岩，觀
下菊，叢中大金錢。一種已爛漫，穠香正午薰。入
酒盃，不待轟飲已有醉意。其旁丹桂二畝，皆盛
開，多繁枝芳氣，尤不可耐。攜壺渡石梁，登姑蘇
後臺，躋攀勇往，謝去巾輿，筇杖石棱，草滑皆若
飛步。山頂正平，有砌堂，鮮石可列坐，相傳為吳
故宮。閒臺別館，所在其前。湖光接松陵，獨見孤
塔之尖，少北墨點一螺，為崑山。其後西山競秀，
縈青叢碧，與洞庭林屋相賓。大約目力踰百里，
具登高臨遠之勝。始余使金，是日過燕山館，嘗
賦水調首句云：萬里漢家使，後每自和。桂林云
萬里漢都護，成都在萬里。橋邊客明年徘徊藥
市，頗歎倦游不復再賦。但有詩云：年來厭把三
邊酒，此去休哦萬里詩。今年幸甚獲歸，故園偕
隣曲二三子，酬酢佳節於鄉山之上，乃復用舊
韻首句云：萬里吳船泊歸，訪菊籬秋。

石湖詞浪淘沙黯淡養花天小雨能慳烟輕雲
薄有無間官柳絲絲都綠遍猶有春寒空翠溼
征鞍馬首千山多情若是肯俱還別有玉杯承
露冷留共君看玉杯官舍中牝丹絕品也
菩薩蠻云雪林一夜收寒了東風愜向燈前到
今夕是何年新春新月圓綺叢香霧隔猶記疎
狂客留取縷金
旛夜蛾相並看

洪邁

邁字景盧號野處又號容齋鄱陽人忠宣公皓子
紹興十五年登第兄文惠適文安遵皆中博學宏
詞科由是三洪名滿天下累遷吏禮二部員外郎
尋進煥章閣學士知紹興告老以端明殿學士致
仕卒謚文敏有容齋五筆夷堅志萬首唐人絕句
野處類藁行于世

踏莎行

院落深沈池塘寂靜簾鈎捲上梨花影寶箏拈得鴈難
尋篆香消盡山空冷 釵鳳斜敧鬢蟬不整殘紅立褪
慵看鏡杜鵑啼月一聲聲等閒又是三春盡

夷堅志紹興間余在臨安試詞科三場畢與五
友同過抱劍街孫氏小樓夜月如晝正臨闌憑
几兩燭結花燦然若連珠孫倡黠慧白坐中曰
今夕桂魄皎潔燭花呈祥五君較藝蘭省其高
掇不疑請各賦一詞為他日佳話何自明即操
筆作浣溪沙一闕云草草杯盤訪玉人燈花呈
喜坐添春邀郎覓句要清新黛淺波嬌情脈脈
雲輕柳弱意真真從今風月屬閒人衆傳觀歡

賞獨恨其末句失意余續臨江仙曰綺席流歡
歡正洽高樓佳氣重重釵頭小篆燭花紅直須
將喜事來報主人公桂月十分春正半廣寒宮
殿匆匆姮娥相對曲闌東雲梯知不遠平步躡
東風孫滿酌一觥相屬相勸曰學士必高中此
瑞殆為君設也已而果奏名賜第餘皆不偶

陸游

游字務觀山陰人以蔭補登仕郎隆興初賜進士
出身范成大帥蜀為參議官以文字交不拘禮士
人譏其類放因自號放翁嘉泰初詔同修國史陞
寶章閣待制有劍南集詞二卷
劉潛夫云放翁稼軒一埽纖豔不事穿鑿高則高
矣但時時掉書袋要是一癖

朝中措

梅

幽姿不入少年場無語只淒涼一箇飄零身世十分冷
淡心腸江頭月底新詩舊恨孤夢清香任是春風不
管也曾先識東皇

烏夜啼

金鴨餘香尚暖綠窻斜日偏明蘭膏香染雲鬟膩釵墜
滑無聲冷落鞦韆伴侶闌珊打馬心情繡屏驚斷滿
湘夢花外一聲鶯

又

紈扇嬋娟素月紗巾縹緲輕煙高槐葉長陰初合清潤
雨餘天弄筆斜行小草鉤簾淺醉閒眠更無一點塵
埃到枕上聽新蟬

鶴林玉露陸務觀農師之孫有詩名恃酒類放
因自號放翁作詞云橋如虹水如空一葉飄然
煙雨中天教稱放翁晚年為韓平原作南園記
除從官楊誠齋寄詩云君居東浙我江西鏡裏
新添幾縷絲花落六回疎信息月明十里兩相
思不應李杜翻鯨海更羨夔龍集鳳池道是樊
川輕薄殺猶將萬戶比千詩蓋切磋之也然南
園記唯勉以忠獻之事業無諛辭晚年和平粹
美有中原承平時氣象朱文公喜稱之
者舊續聞陸放翁官南昌日代還有贈別詞云

雨斷西山晚照明，悄無人幽夢自驚。說道去多時也到如今，真箇成行遠山已，是無心畫小樓空斜掩。繡屏你，嚟早收心呵，趁劉郎雙鬢未星。又閒居三山日，方務德侍郎攜妓訪之，公有詞云：三山山下閒居士，巾屨蕭然小醉閒。眠風引飛花落釣船，並不載於集。

齊東野語：放翁在蜀日有所盼賦詩云：碧玉當年未破瓜，學成歌舞入侯家。如今顚顚蓮窻底，飛上青天妬落花。出蜀後每懷舊遊，多見之賦咏有云：金鞭珠彈憶春游，萬里橋東晝樓夢。倩曉風吹不斷，書憑春雁寄無由。鏡中顏鬢今如此，席上賓朋好在否。篋有吳牋三百箇，擬將細字說春愁。又云：裘馬清狂錦水濱，最繁華地作閒人。金壺投箭消長日，翠袖傳杯領好春。幽鳥語隨歌處拍，落花鋪作舞時茵。悠然自適君知否，身與浮名孰重輕。又以此詩藥拈作風入

松云十年裘馬錦江濱酒隱紅塵黃金選勝鶯
花海倚踈狂驅使青春弄笛魚龍盡出題詩風
月俱新自憐華髮滿紗巾猶是官身鳳樓曾記
當時語問浮名何似身親欲寫吳牋說與這回
真箇閒人前輩風流
雅韻猶可想見也

陸
淞

淞字子逸號雲溪山陰人耆舊續聞云陸辰州子
逸左承佃之孫晚以疾廢卜築於秀野越之佳山
水也放傲世間不復有營念對客
則終日清談不倦尤好語前輩事

瑞鶴仙

臉霞紅印枕睡覺來冠兒還是不整屏間麝煤冷但眉

峰壓翠淚珠彈粉堂深晝永燕交飛風簾露井恨無人
說與相思近日帶圍寬盡重省殘燈朱幌淡月紗窗
那時風景陽臺路迴雲雨夢便無準待歸來先指花梢
教看却把心期細問問因循過了青春怎生意穩

耆舊續聞云南渡初南班宗子寓居會稽為近屬
士園亭甲於浙東一時坐客皆騷人墨士陸子逸
嘗與焉士有侍姬盼盼者色藝殊絕公每屬意焉
一日宴客偶睡不預捧觴之列陸因問之士即呼
至其枕痕猶在臉公為賦瑞鶴仙有臉霞紅印枕
之句一時盛傳逮今為雅唱後盼盼亦歸陸氏
張叔夏云景中帶情屏去浮豔

韓元吉

元吉字无咎號南礪許昌人門下侍郎維四世孫
東萊先生呂伯恭之外舅也官至吏部尚書有焦
尾集詞一卷子
澆仲止有詩名

水龍吟

雨餘疊巘浮空望中秀色仙都是洞天未鎖人間春老
玉妃曾墜錦瑟繁絃鳳簫清響九霄歌吹問分香舊事
劉郎去後知誰伴風前醉 回首暝煙千里但紛紛落
紅如洗多情易老青鸞何許詩成誰寄斗轉參橫半簾

花影一溪寒水悵飛鳧路杳行雲夢遠有三峰翠

者舊續聞云元豐中緡雲令開封李長卿女慧性過人姿度不凡染疾逝殯於邑之仙巖寺三峰閣李公罷因昇歸宣和庚子青溪寇起焚燬無遺惟三峰閣獨存主簿以為解舍濟南王傳慶及內表曹穎偕來館曹于廳治之東一夕有女子打扃而至興語皆出塵氣詰其姓氏曰開封李長卿女李萼其名英華其字辟穀有年身輕於羽知子鰥居故來相慰唱和殆無虛日曹有親陳觀察挽之從軍將就道英華與訣曰妾與君之緣斷矣子宿緣寡淺塵業未償他日當有兵難敬授靈香一瓣有急請燕以告當陰有所護不然亦無如之何也曹公勇為朔方之行不意獲譴麾下追惟英華之言欲取所遺香燕之軍行無宿火卒正法英華詩有云醒酒清風搖竹去催詩小雨過山來非詩人所

易到也

文獻通考云英華集三卷李季萼為鬼仙縉雲人

傳其詩亦怪矣

墨莊漫錄云處州縉雲簿廳為武尉司項有一婦人常現形與人接妍麗閒婉有殊色其來也異香芬馥非世間之香自稱曰英華或曰綠華前後官此者多為所惑永嘉蔣輝遠為邑簿祠以香火其怪遂絕

好事近

汴京
賜宴

凝碧舊池頭一聽管絃淒切多少梨園聲在總不堪華

髮杏花無處避春愁也傍野花發惟有御溝聲斷似

知人嗚咽

金史交聘表云大定十三年三月癸巳朔宋遣試
禮部尚書韓元吉利州觀察使鄭興裔等賀萬春
節按宋孝宗乾道九年為金世宗大定十三年南
澗汴京賜宴之詞當是此時作

姚寬

寬字令威號西溪會稽續志姚寬噪人以父舜明
任補官權尚書戶部員外郎樞密院編修官詞章
之外頗工篆隸及工伎之事請用韓世忠舊法以
意增損為三弓合蟬弩詔許之既成矢激二里所
中皆沒羽又嘗論大駕鹵簿指南車得古不傳之
法所著有西溪集十卷注司馬遷史記一百三十
卷西溪叢語一卷玉璽書一卷葉水心跋西溪集
云公著書二百卷古今同異無不槩括惜其盛年
不預采錄晚始召對
殿中忽感風眩而死

菩薩蠻

斜陽山下明金碧，畫樓返照融春色。
睡起揭簾旌，玉人蟬鬢輕。
無言空佇立，花落東風急。
燕子引愁來，眉愁那得開。

生查子

郎如陌上塵，妾似堤邊樹。
一作絮相見兩悠悠，揚蹤跡無尋處。
酒面撲春風，淚眼零秋雨。
過了別離時，還解相思否。

吳琚

琚字居父號雲壑汴人憲聖太后之姪太寧郡王益之子歷尚書郎部使者直學士慶元間以鎮安節度使留守建康遷少保卒謚忠惠有雲壑集

柳梢青

元日立春

綵仗鞭春椒盤迎旦斗柄回寅拂面東風雖然料峭終是寒輕帶花折柳心情怎捱得元宵放燈不是東園有些殘雪先去踏青

浪淘沙

雲葉弄輕陰屋角鳩鳴青梅著子欲生仁冷落江天寒
食雨花事闌情池館晝盈盈人耐寒輕一川芳草只
銷凝時有入簾新燕子明日清明

又

岸柳可藏鴉路轉溪斜忘機鷗鷺立汀沙咫尺鐘山迷
望眼一半雲遮臨水整烏紗兩鬢蒼華故鄉心事在
天涯幾日不來春便老開盡桃花

景定建康志引此詞題云游青溪呈馬野亭野亭
跋其後云秦淮海之詞獨擅一時字未聞米寶晉

善詩然終不及字若公可謂兼之矣辛酉季春承
議郎充江南東路轉運司主管文字馬之純謹書
武林舊事淳熙九年八月十八日駕詣德壽宮
奉迎上皇觀潮百戲撮弄各呈技藝上皇喜曰
錢唐形勝天下所無上起奏曰江潮亦天下所
獨宣諭侍臣各賦醉江月一闕至晚呈上以吳
琚為第一其詞曰玉虹遙挂望青山隱隱恍如
一抹忽覺天風吹海立好似春霆初發白馬凌
空瓊鼇駕水日夜朝天闕飛龍舞鳳鬱蔥環拱
吳越此景天下應無東南形勝偉觀真奇絕好
是吳兒飛絲織蹴起一江秋雪黃屋天臨水犀
雲擁看擊中流楫晚來波靜海門飛上明月兩
宮賞賜無限
至月上始還

辛棄疾

卷一
棄疾字幼安號稼軒歷城人耿京聚兵山東節制
忠義軍馬留掌書記奉表來歸高宗召見授承務
郎差簽判江陰累官浙東安撫加龍圖閣待制樞
密院都承旨德祐初以謝枋得請贈少師謚忠敏
有稼軒長短

句十二卷

劉後邨云公所作大聲鏜鞳小聲鏗鉤橫絕六合
掃空萬古其穠麗綿密者亦不在小晏秦郎之下

摸魚兒

更能消幾番風雨
恁恁春又歸去
惜春長怕花開早
何況落紅無數
春且住見說道
天涯芳草無歸路
怨春不語
算只有殷勤畫簷蛛網盡日惹飛絮
長門事準擬

佳期又誤蛾眉曾有人妬千金縱買相如賦脈脈此情誰
訴君莫舞君不見玉環飛燕皆塵土閒愁最苦休去倚
危欄斜陽正在烟柳斷腸處

鶴林玉露云辛幼安晚春摸魚兒詞意殊怨斜陽
烟柳之句比之未須愁日暮天際是輕陰者異矣
使在漢唐時寧不賈種豆種桃之禍哉愚聞壽皇
見此詞頗不悅然終不加罪可謂盛德也已

瑞鶴仙

梅

雁霜寒透幙正護月雲輕嫩冰猶薄溪奩照梳掠想含
香弄粉靚妝難學玉肌瘦弱更重重龍綃襯著倚東風

金瓶梅詞話卷一
一
一笑嫣然轉盼萬花羞落
寂寞家山何在雪後園林
水邊樓閣瑤池舊約鱗鴻更仗誰託粉蝶兒只解尋花
覓柳開徧南枝未覺但傷心冷淡黃昏數聲畫角

祝英臺近

寶釵分桃葉渡煙柳暗南浦怕上層樓十日九風雨斷
腸點點飛紅都無人管倩誰勸啼鶯聲住鬢邊覩應
把花卜歸期纔簪又重數羅帳燈昏哽咽夢中語是他
春帶愁來春歸何處却不解帶將愁去

貴耳集云呂婆呂正己之妻正己為京畿漕有女
事辛幼安因以微事觸其怒竟逐之今稼軒桃葉

渡詞因此而作

詞旨警句應把花卜歸期纔簪又重數祝英臺近

是他春帶愁來春歸何處却不解帶將愁去同上

歸潛志党懷英辛棄疾少同舍屬金國初亂辛

率數千騎南渡顯于宋党在北擢第八翰林二

公皆有榮寵後辛退閑有鷓鴣天云壯歲旌旗

擁萬夫錦韉突騎渡江初燕兵夜捉銀胡衆漢

箭朝飛金僕姑思往事歎金吾春風不染白髭

鬚都將萬字平戎策換得東郊種樹書

清波別志稼軒在上饒屬其室病呼醫對脈吹

笛婢名整整者侍側乃指以謂醫曰老妻病安

以此人為贈不數日果勿藥乃踐前約整整去

因口占好事近云醫者索酬勞那得許多錢帛

只有一箇整整也合盤盛得下官歌舞轉淒涼

賸得幾枝笛，觀著者般火色。告媽媽，將息一時。
戲謔風調不羣。

太平清話，鉛山縣南二里許，有稼軒書院。分水
嶺下，厥墓在焉。張堃古山樂府水龍吟，醉稼
軒墓云：嶺頭一片青山，可能埋沒淩雲氣。遐方
異域，當年滴盡英雄清淚。星斗撐腸，雲煙盈紙，
縱橫遊戲。謾人間留得陽春，白雪千載下無人
繼。不見戟門華第，見蕭蕭竹枯松悴。問誰料理
帶湖煙景，瓢泉風味。萬里中原，不堪回首，人生
如寄。且臨風高唱，逍遙舊曲，為先生醉。

劉過

過字改之，號龍洲道人。太和人。有龍洲集詞一卷。

黃叔暘云：改之稼軒之客詞，多壯語。蓋學稼軒者也。

陶九成云改之造
詞膽逸有思致

賀新郎

老去相如倦。向文君說似而今怎生消遣。衣袂京塵曾
染處。空有香紅尚軟。料彼此魂銷腸斷。枕新涼。眠客
舍。聽梧桐。疎雨。秋聲顫。燈暈冷。記初見。樓低不放珠
簾捲。晚妝殘。翠鈿狼籍。淚痕凝臉。人道愁來須殢酒。無
奈愁多酒淺。但託意焦琴。紈扇。莫鼓琵琶江上曲。怕荻
花。楓葉俱淒怨。雲萬疊。寸心遠。

龍洲詞題云去年秋余試牒四明賦贈老娼至今
天下與禁中皆歌之江西人來以為鄧南秀詞非
也

唐多令

蘆葉滿汀洲寒沙帶淺流二十年重到南樓柳下繫船
猶未穩能幾日又中秋黃鶴斷磯頭故人今在否舊
江山總是新愁欲買桂花重載酒終不似少年遊

龍洲詞題云安遠樓小集有觴歌板之姬黃其姓
者乞詞於龍洲道人為賦此唐多令同柳阜之劉
去非石民瞻周嘉仲陳孟參孟容時八月五日也
花菴詞選題云重過武昌

醉太平

情高意真眉長鬢青小樓明月調箏寫春風數聲思
君憶君魂牽夢縈翠銷香暖雲屏更那堪酒醒

詞旨警句翠銷香暖雲
屏更那堪酒醒醉太平

吹劍錄稼軒帥越招劉改之不去乃寄情沁園
春曰斗酒歲肩風雨渡江豈不快哉被香山居
士約林和靖與東坡老駕勒吾回坡謂西湖正
如西子濃抹淡妝臨照臺二人者俱掉頭不顧
只管傳杯白云天竺去來看金碧崢嶸圖畫開
更縱橫一澗東西水遶兩山南北高下雲堆逋
曰不然暗香疎影何似孤山先探梅須晴去訪
稼軒未晚且此徘徊此詞雖粗而局段高與三

賢游固可睨視稼軒視林白之清致則東坡所謂淡妝濃抹已不足道稼軒富貴焉能免我哉江湖紀聞劉改之以性疎豪好施辛稼軒客之稼軒帥淮時改之以母病告歸囊索蕭然是夕稼軒與改之微服登倡樓適一都吏命樂飲酒不知為稼軒也命左右逐之二公大笑而歸即以有機密文書喚某都吏其夜不至稼軒欲籍其產而流之言者數十皆不能解遂以五千緡為改之母壽請言于稼軒稼軒曰未也今倍之都吏如數增作萬緡稼軒為買舟于岸舉萬緡于舟中曰可即行無如常日輕用也改之作念奴嬌為別云知音者少算乾坤許大著身何處直待功成方肯退何日可尋歸路多景樓前垂虹亭下一枕眠秋雨虛名相誤十年枉費辛苦不是奏賦明光上書北闕無驚人之語我自匆忙天不肯贏得衣裾塵土白壁堆前黃金買笑

付與君為主，萼鱸江上浩然。明月歸去，
游宦紀聞，予於菊磎高九萬處，見蘇紹叟手書。
憶劉改之摸魚兒一闌云：望闌河試窮迷眼，新愁
似絲千縷。劉郎豪氣今何在？應是九疑三楚堪
恨處。便拚得一生寂寞，長羈旅，無人寄語，但弔
麥傷桃邊松倚竹，空憶舊詩句。文章事到底將
身自誤。功名難料，遲暮鷄衣簞食，年年瘦受侮。
世間兒女，君信否？盡縣簿高門，歲晚誰青顏何
如？引去任槎上張騫山中，李廣商畧儘風度。紹
叟有冷然詩集十卷行於世。

謝懋

懋字勉仲，有靜寄。

居士樂章二卷。

黃叔暘云：居士樂章，吳坦伯明為序，稱其
片言隻字，夏玉敲金，蘊藉風流，為世所賞。

驀山溪

厭厭睡起無限春情緒
柳色借輕煙尚瘦怯東風倦舞
海棠紅皺不奈晚來寒簾半捲日西沈寂寞閒庭戶
飛雲無據化作溟濛雨
愁裏見春來又只恐愁催春去
惜花人老芳草夢淒迷
題欲徧瑣窗紗總是傷春句

風入松

老年常憶少年狂
宿粉棲香自憐獨得東君意
有三年
窺宋東牆笑舞落花紅影醉
眠芳草斜陽事隨春夢

去悠揚休去思量近來眼底無姚魏有誰更管領年芳
換得河陽衰鬢一簾煙雨梅黃

浪淘沙

黃道雨初乾霽靄空蟠東風楊柳碧參參燕子不歸花
有恨小院春寒倦客亦何堪塵滿征衫明朝野水幾
重山歸夢已隨芳草綠先到江南

霜天曉角

桂花

綠雲剪葉低護黃金屑占斷花中聲譽香和韻兩清潔

勝絕君聽說當時來處別試看仙衣猶帶金庭露玉

階月

詞旨警句燕子不歸花
有恨小院春寒浪淘沙

章良能

良能字達之麗水人淳熙五年進士除著作佐郎
嘉泰元年為起居舍人寧宗朝居兩制登政地謚
文莊有嘉
林集百卷

小重山

柳暗花明春事深小闌紅芍藥已抽簪雨餘風軟碎鳴

禽遲遲日猶帶一分陰 往事莫沈吟身閒時序好且
登臨舊游無處不堪尋無尋處惟有少年心

齊東野語外大父文莊章公自少好雅潔性滑稽
居一室必汎埽圻飾陳列琴書親朋或譏其齷齪
無遠志一日大書素屏云陳蕃不事一室而欲埽
除天下吾知其無能為矣識者知其不凡間作小
詞極有思致先妣能口誦數首小重山云云

陳亮

亮字同甫號龍川永康人隆興初以解頭薦上中
興五論不報居太學上舍紹興四年光宗親策進
士擢為第一授建康軍簽判未至官病一夕而卒
端平初謚文毅有龍川集詞二卷

葉水心云同甫長短句四卷每一章成輒自歎曰平生經濟之懷畧已陳矣予所謂微言多此類也

水龍吟

開花深處層樓畫簾半捲東風軟春歸翠陌平莎茸嫩
垂楊金淺遲日催花淡雲閣雨輕寒輕暖恨芳菲世界
游人未賞都付與鶯和燕寂寞憑高念遠向南樓一
聲歸雁金釵鬪草青絲勒馬風流雲散羅綬分香翠綃
封淚幾多幽怨正銷魂又是疎煙淡月子規聲斷

詞旨屬對羅綬分香翠綃封淚
龍川詞好事近咏梅云的礫三兩枝點破暮煙

蒼碧好在屋簷斜處。傍玉奴吹笛，月華如水。過
林塘花影，弄苔石欲向夢中飛。蜨恐幽香難覓。

真德秀

德秀字希元，浦城人。慶元五年進士，授南劍州判
官。繼試中博學宏詞科，為太學正。紹定中，召為禮
部侍郎，拜參知政事，進資政殿直學士，提舉萬壽
觀。卒，謚文忠。學者稱西山先生。有真文忠公集五

十四卷

蜨戀花

紅梅

兩岸月橋花半吐，紅透肌香暗把遊人誤。盡道武陵溪
上路，不知迷入江南去。先自冰霜真態度，何事枝頭

點點胭脂汙莫是東君嫌淡素問花花又嬌無語

劉光祖

光祖字德修號後谿簡池人登進士第慶元初官
侍御史改司農少卿遷起居郎終顯謨閣直學士
提舉嵩山崇福宮
卒有鶴林詞一卷

洞仙歌

荷敗

晚風收暑小池塘荷靜獨倚胡牀酒初醒起徘徊時有
香氣吹來雲藻亂葉底游魚動影空擎承露蓋不見
冰容惆悵明妝曉鸞鏡後夜月涼時月淡花低幽夢覺

欲憑誰省也應記臨流凭闌干便遙想江南紅酣千頃

鵲林詞踏莎行埽徑花零閉門春晚恨長無奈
東風短起來消息探荼蘼雪條玉蕊都開徧晚
月魂清夕陽香遠故山別後誰拘管多情於此
更情多一枝艱罷還重撚

魏了翁鶴山集劉左史光祖之生正月十日李
夫人之生以十九日賦浪淘沙寄之鶴外倚樓
看雲颭晴天天高難犬礙雲闌掉臂雙仙留不
徹還住人間客佩振珊珊來賀平安年年直待
卷燈還似是天公
偏著意占破春閒

蔡桄

桄字堅老南城人宣和以前人沒於乾道庚寅曾
公卷呂居仁輩皆與之倡和有雲壑隱居集三卷

詞有浩歌集一卷趙希弁讀
書附志云嘗為宜春別駕

鷓鴣天

病酒厭厭與睡宜珠簾羅幙捲銀泥風來綠樹花含笑
恨入西樓月斂眉驚瘦盡怨歸遲休將桐葉更題詩
不知橋下無情水流到天涯是幾時

洪咨夔

咨夔字舜俞號平齋於潛人嘉定二年進士累官
刑部尚書翰林學士知制誥加端明殿學士提舉
萬壽觀端平三年卒謚
忠文有平齋集詞一卷

眼兒媚

平沙芳草渡頭村。綠遍去年痕。游絲上下，流鶯來往，無限銷魂。
綺窗深靜人歸晚。金鴨水沈溫。海棠影下，子規聲裏，立盡黃昏。

詞旨警句海棠影下子規聲裏立盡黃昏眼兒媚

平齋詞南鄉子德清舟中和韻云霜月冷娉婷
夾岸蘆花雪點成短艇水晶宮裏繫閒情誰道
芙蓉更有城阿鵲數歸程人倚低窗小畫屏莫
恨年華飛上鬢堪憑一度春風一度鶯

岳珂

珂字肅之號亦齋亦號倦翁相臺人忠武王孫敷
文閣待制霖子管内勸農使知嘉興歷官戶部侍
郎淮東總領兼制置使有玉楮集魏鄭公錄讀史備
忘東陸事畧程史籲天辨誣錄金陀粹編行世

滿江紅

小院深深悄鎮日陰晴無據春未足閨愁難寄琴心誰
與曲徑穿花尋蛺蝶虛闌傍日教鸚鵡笑十三楊柳女
兒腰東風舞雲外月風前絮情與恨長如許想綺窗
今夜與誰凝竚洛浦夢回留珮客秦樓聲斷吹簫侶正
黃昏時候杏花寒廉纖雨

生查子

芙蓉清夜游楊柳黃昏約小院碧苔深潤透雙鴛薄
暖玉慣春嬌簌簌花鈿落缺月故窺人影轉闌干角

京口三山志岳珂登多景樓祝英臺近云甕城
高盤徑近十里笋輿穩欲駕還休風雨苦無準
古來多少英雄平沙遺恨又總被長江流盡倩
誰問因甚衣帶中分吾家自畦畛落日潮頭慢
寫屬鏤情斷腸煙樹揚州興亡休論正愁盡河
山雙鬢

張 鉉

鉉字功甫號約齋西秦人循王諸孫居臨安官奉
議郎有玉照堂詞一卷

念奴嬌

宜雨庭咏
千葉海棠

綠雲影裏把明霞織就千里文繡紫膩紅嬌扶不起好
是未開時候半怯春寒半便晴色養得胭脂透小亭人
靜嫩鶯啼破春晝猶記攜手芳陰一枝斜戴嬌艷波
雙秀小語輕憐花總見爭得似花長久醉淺休歸夜深
同睡明日還相守免教春去斷腸空歎詩瘦

武林舊事云張約齋桂隱百果在南湖有玉照堂
梅花四百株蒼寒堂青柏二百株艷香館襍春花
百餘株碧宇修竹十畝藥珠洞茶蘼二十五株綠
畫軒木犀臨砌書葉軒柿二十株餐霞軒櫻桃三

十餘株宜雨亭海棠二十株夾流水滿霜亭橋五十餘株

昭君怨

園池
夜泛

月在碧虛中
住人向亂荷中去
花氣雜風涼
滿船香雲被歌聲搖動
酒被詩情掇送
醉裏卧花心
擁紅衾

玉照堂詞咏菱鵲橋仙云連汀接渚
紫蒲帶藻萬葉香浮光滿濕煙吹霽
木蘭輕照波底紅嬌翠婉玉纖採來
銀籠橋去一曲山長水遠綠鴛雙慣
貼人飛恨南浦離多夢短

盧祖臯

祖臯字申之號蒲江永嘉人慶元中登進士第為軍器少監嘉定十四年權直學士院有蒲江詞一

卷

黃叔賜云蒲江樓玫瑰之甥趙紫芝翁靈舒之詩

友樂章甚工字字可入律呂

東嘉姓譜盧中之嘉定中以軍器少監直北門屬
時慶澤孔殷論言布帛昇抒思泉湧號為稱職俄
卒于官工樂府江浙間多歌之

宴清都

初春

春訊飛瓊管風日薄度牆啼鳥聲亂江城次第笙歌翠
合綺羅香暖溶溶澗綠冰泮醉夢裏年華暗換料黛眉
重鎖隋隄芳心暗動梁苑新來雁濶雲音鸞分鏡影
無計重見帝春細雨籠愁淡月恁時庭院離腸未語先

斷算猶有憑高望眼更那堪芳草連天飛梅弄晚

江城子

畫樓簾幙捲新晴掩銀屏曉寒輕墜粉飄香日日喚愁
生暗數十年湖上路能幾度著娉婷年華空自感飄
零擁春醒對誰醒天濶雲閒無處覓簫聲載酒買花年
少事渾不似舊心情

賀新涼

彭傳師于吳江三高堂之前作釣雪亭
蓋擅漁人之窟宅以供詩境也子野命

予賦

之

挽住風前柳問鴟夷當日扁舟近曾來否月落潮生無限事零亂茶煙未久謾留得尊鱸依舊可是從來功名誤撫荒祠誰繼風流後今古恨一搔首江涵雁影梅花瘦四無塵雪飛風起夜窻如晝萬里乾坤清絕處付與漁翁釣叟又恰是題詩時候猛拍闌干呼鷗鷺道他年我亦垂綸手飛過我共樽酒

程史云彭傳師名法以恩科得官依錢東岩之門督府嘗欲舉以使金不克遣終老于選調云

中吳紀聞云越上將軍范蠡江東步兵張翰贈右補闕陸龜蒙各有畫像在吳江鱸鄉亭旁東坡嘗

有吳江三賢畫像詩後易其名曰三高且更為塑像
耀菴主人王文孺獻其地雪灘因遷之今在長橋之北
與垂虹亭相望石湖居士為之記
吳郡志云三高祠在吳江縣垂虹橋北即王氏耀菴之雪灘也
昔堂在垂虹南地極偏仄乾道三年縣令趙伯虞徙之雪灘
又云耀菴在松江之濱邑人王份有超俗趣營此以居
圍江湖以入園故多柳塘花嶼景物秀野名聞一時
名勝喜游之皆為題詩園中有與閑平遠種德及煙雨觀橫秋閣凌風臺
鬱栽城釣雪灘琉璃沼耀翁澗竹廳龜巢雲關顯林楓林等處而浮天閣為第一
總謂之耀菴份字文孺以特恩補官嘗為大治令歸老焉
嘉靖吳江縣志釣雪亭在雪灘宋嘉泰二年縣尉彭法建華亭林至記

倦尋芳

春思

香泥壘燕密葉巢鶯春暗寒淺花徑風柔著地舞茵紅
軟鬪草煙欺羅袂薄鞦韆影落春遊倦醉歸來記寶帳
歌慵錦屏春暖別來悵光陰容易還又荼蘼牡丹開
遍妬恨疎狂那更柳花盈面鴻羽難憑芳信短長安猶
近歸期遠倚危樓但鎮日繡簾高捲

清平樂

錦屏開曉寒入宮羅峭脈脈不知春又老簾外舞紅多
少舊時駐馬香階如今細雨蒼苔殘夢不成重理一

雙蝴蝶飛來

又

柳邊深院燕語明如剪消息無憑聽又懶隔斷畫屏雙
扇寶杯金縷紅牙醉魂幾度兒家何處一春游蕩夢
中猶恨楊花

謁金門

香漠漠低捲水風池閣玉腕籠紗金半約睡濃團扇落
雨過涼生雲薄女伴棹歌聲樂采得雙蓮迎笑剝柳

欽定四庫全書

絕妙好詞箋
卷一

二十九

陰多處泊

又

風不定移去移來簾影一雨池塘新綠淨杏梁歸燕並
翠袖玉屏金鏡薄日綺疏人靜心事一春疑酒病鳥
啼花滿徑

烏夜啼

幾曲微風按柳生香暖日蒸花鴛鴦睡足方塘晚新綠
小窗紗尺素難將情緒嫩羅還試年華憑高無處尋

殘夢春思入琵琶

又西
湖

漾暖紋波颭颭吹晴絲雨濛濛輕衫短帽西湖路花氣
撲青驄鬪草褰衣濕翠鞦韆瞥眼飛紅日長不放春
醪困立盡海棠風

張履信

履信字思順號遊初鄱陽人侍郎南仲之孫嘗監
江口鎮官至連江守

柳梢青

雨歇桃繁風微柳靜日淡湖灣寒食清明雖然過了未
覺春閒行雲掩映春山真水墨山陰道間燕語侵愁
花飛撩恨人在江南

謁金門

春睡起小閣明窻兒底簾外雨聲花積水薄寒猶在裏
欲起還慵未起好是孤眠滋味一曲廣陵應忘記起
來調綠綺

周文璞

文璞字晉仙號方泉又號野齋又號山樞陽穀人
有方泉先生集二卷子伯敬能詩

一剪梅

風韻蕭疎玉一團更著梅花輕裊雪鬟這回不是戀江
南只為溫柔天上人間 賦罷閒情共倚闌江月庭蕪
總是銷魂流蘇斜掩燭花寒一樣眉尖兩處闌山

張伯雨貞居詞云周晉仙浪淘沙云還了酒家
錢便好安眠大槐宮裏著貂蟬行到江南知是
夢雪壓漁船盤礴古梅邊也是前緣驚黃雪白
又醒然一事最奇君聽取明日新年晉仙宋南
渡來名士一號方泉老人此詞鮮于困學每愛
書之百年後方外士張伯雨追和一章以為笑

樂惜因學公不能為我賞音挑下杖頭錢取次
高眠玉梅金縷孟家蟬說著錢塘都是夢嬾問
游船誰信酒壚邊別有仙緣自家天地一陶然
醉寫桃符都不記明日新年

徐照

照字道輝又字靈暉號山民永嘉人與徐璣翁卷
趙師秀號永嘉四靈詩皆工晚唐體有山民集

南歌子

簾影篸金線爐煙裊翠絲菰芽新出滿盆池
喚取玉瓶添水買魚兒
意取釵重碧慵梳髻翅垂相思無處說
相思笑把畫羅小扇覓春詞

清平樂

綠圍紅繞一枕屏山曉
怪得今朝偏起早
笑道牡丹開了
迎人捲上珠簾小
螺未拂眉尖
貪教玉籠鸚鵡
飛花飛滿妝奩

阮郎歸

綠楊庭戶靜沈沈
楊花吹滿襟
晚來閒向水邊尋
鷺飛雙浴禽
分別後
重登臨
暮寒天氣陰
妾心移得在君心
方知人恨深

詞旨警句相思無處說相思笑把畫羅小扇覓春
詞南歌子 妾心移得在君心方知人恨深阮郎歸

俞灝

灝字商卿世居杭紹興四年進士開禧議開邊政
府密引灝畫計灝言輕脫寡謀之人不可信趙良
嗣張覺往轍可鑒歷秉麾節皆有聲寶慶二年致
仕築室九里松自號青松居士有青松居士集

點絳脣

欲問東君為誰重到江頭路斷橋薄暮香透溪雲渡

細草平沙愁入淩波步今何許怨春無語片片隨流水

潘牂

犛字庭堅號紫巖閩人端平二年進士廷對第三人歷太學正通判潭州有紫巖集

南鄉子

生怕倚闌干閣下溪聲閣外山空有舊時山共水依然
暮雨朝雲去不還相見躡飛鸞月下時時認佩環月
又漸低霜又下更闌折得梅花獨自看

劉後村詩話題云鐔津懷舊花菴絕妙詞選題云
題南劍州妓館

劉後村詩話延平樂籍中有能墨竹草聖者潘
廷堅為賦念奴嬌美其書畫末云玉帶懸魚黃
金鑄印侯封萬戶待從頭繳納君王覓取愛卿
歸去余罷袁守歸塗赴郡集席間借觀今不復

有此雋人矣

吳中舊事潘庭堅羽仙歌云雕簷綺戶倚晴空
如畫曾是吳王舊臺榭自浣紗去後落日平蕪
行雲斷幾見花開花謝淒涼闌干外一簇江山
多少圖王共爭霸莫閑愁金杯潑灑對酒當歌
歡娛地夢中興亡休話漸倚遍西風晚潮生明
月裏鷺鷥背人飛下

劉翰

翰字武子長沙人吳雲壑居父之客有小山集一卷

好事近

花底一聲鶯花上半鉤斜月月落烏啼何處點飛英如

雪東風吹盡去年愁
解放丁香結
驚動小亭紅雨舞
雙雙金蝶

蝶戀花

團扇題詩春又晚
小夢驚殘
碧草池塘滿
一曲銀鈎簾半捲
綠窗睡足鶯聲軟
瘦損衣圍羅帶減
前度風流
陡覺心情嬾
誰品新腔
拈翠管
畫樓吹徹江南怨

清平樂

淒淒芳草怨得王孫老
瘦損腰圍羅帶小
長是錦書來

少玉簫吹落梅花曉烟猶透輕紗驚起半簾幽夢小
窻淡月啼鴉

詞旨警句驚起半簾幽夢
小窻淡月啼鴉清平樂

劉子寰

子寰字圻父號篁嶸建陽人居麻沙早登朱子之
門劉後邨序其詩行世

霜天曉角

橫陰漠漠似覺羅衣薄正是海棠時候紗窻外東風惡
惜春春寂寞尋花花冷落不會這些情味元不是念

離索

古今詞話所父咏山泉詞云靜坐時看松鼠飲
醉眠不碍山禽浴是真得山泉之趣者

張良臣

俗本作
景臣誤

良臣字武子號雪窻大梁人避地來鄞因家焉隆
興元年試南省魏文節公杞時為參詳官攜其三
策見知舉張燾曰此文拙古必故人張武子所為
及撒棘果良臣也官止監左藏庫有集十卷刻於
廣信
郡

西江月

四壁空圍恨玉十香淺捻啼綃殷雲度雨井桐凋雁雁

無書又到 別後釵分燕尾病餘鏡減鸞腰蠻江荳蔻
影連梢不道參橫易曉

樓鑰攻媿集書張武子詩後云與武子評詩謂
當有悟入處非積學所能到也君讀之以為得
我意又嘗自哦其詩曰客向愁中都老盡祇留
平楚伴銷凝又哦其詞云昨日豆花籬下過忽
然迎面好風吹獨自立多時其大約可見矣閉
門讀書室中無一物性嗜詩未嘗強作或終歲
無一語故所作必絕人妻孥至不免飢寒或謂
君不為歲晚計君曰水禽有名信天公者食魚
而不能捕凝立沙上俟他禽過偶墜魚于前乃
拾之然未聞有餓死者其夷澹類此

絕妙好詞箋卷一

欽定四庫全書

集部

絕妙好詞箋卷三

詳校官中書_臣張姚成

侍讀_臣孫球覆勘

總校官檢討_臣何思鈞

校對官中書_臣高 中

謄錄監生_臣黃春暉

欽定四庫全書

絕妙好詞箋卷二

宋 周密 原輯

宛平查為仁

錢塘厲鶚同箋

姜夔

夔字堯章鄱陽人蕭東夫愛其詞妻以兄子因寓居吳興之武康與白石洞天為鄰自號白石道人又號石帚慶元中曾上書乞正太常雅樂得免解訖不第有白石詩一卷詞五卷又有絳帖平續書譜大樂議張循王遺事集古印譜黃叔陽云白石詞極精妙不減清真其高處有美

成所不能及

沈伯時云姜白石清勁知音未免有生硬處

張叔夏云詞要清空不要質實姜白石如野雲孤
飛去留無迹

暗香

舊時月色算幾番照我梅邊吹笛喚起玉人不管清寒
與攀摘何遜而今漸老都忘却春風詞筆但怪得竹外
疎花香冷入瑤席江國正寂寂歎寄與路遙夜雪初
積翠樽易竭紅萼無言耿相憶長記曾攜手處千樹壓
西湖寒碧又片片吹盡也幾時見得

硯北雜志小紅范成大青衣也有色藝成大請老
姜夔詣之一日授簡徵新聲夔製暗香疎影兩曲
成大使二妓習之音節清婉成大尋以小紅贈之
其夕大雪過垂虹賦詩曰自喜新詞韻最嬌小紅
低唱我吹簫曲終過盡松
陵路回首煙波十四橋

疎影

仲呂宮

苔枝綴玉有翠禽小小枝上同宿客裏相逢離角黃昏
無言自倚修竹昭君不慣吳沙遠但暗憶江南江北想
珮環月下歸來化作此花幽獨 猶記深宮舊事那人
正睡裏飛近蛾綠莫似春風不管盈盈蚤與安排金屋

還教一片隨波去又却怨玉龍哀曲等恁時重覓幽香

己入小窗橫幅

白石道人歌曲題云辛亥之冬予載雪詣石湖止既
月授簡索句且徵新聲作此兩曲石湖把玩不已
使妓肄習之音節諧婉乃命之曰暗香疎影
張叔夏云白石暗香疎影二曲前無古人後無來
者自立新意真為絕唱疎影前段用少陵詩後段
用壽陽事此皆用事不為事使
楊廉夫東維子集云元松陵陸子敬居分湖之北
壘石為山樹梅成林取姜白石詞語名其軒曰舊
時月色

揚州慢
仲呂宮

淮左名都竹西佳處解鞍少駐初程過春風十里盡薺
麥青青自鏜馬窺江去後廢池喬木猶厭言兵漸黃昏
清角吹寒都在空城杜郎俊賞算而今重到須驚縱
豈覩詞工青樓夢好難賦深情二十四橋仍在波心蕩
冷月無聲念橋邊紅藥年年知為誰生

白石道人歌曲題云淳熙丙申至日予過維揚夜
雪初霽薺麥彌望入其城則四顧蕭條寒水自碧
暮色漸起戍角悲吟予懷愴然感慨今昔因自度
此曲十巖老人以為有黍離之感也

玲瓏四犯

黃鍾商

疊鼓夜寒垂燈春淺
怱怱時事如許倦遊歡意少俛仰
悲今古江淹又吟恨賦
記當時送君南浦萬里乾坤百
年身世惟有此情苦
揚州柳垂官路有輕盈換馬端
正窺戶酒醒明月下夢逐潮聲去
文章信美知何用謾
贏得天涯羈旅教說與春來要尋花伴侶

白石道人歌曲題云
越中聞簫鼓感懷

琵琶仙

吳興春遊

雙槳來時有人似舊曲桃根桃葉歌扇輕約飛花蛾眉

正奇絕春漸遠汀洲自綠更添了幾聲啼鵲十里揚州
三生杜牧前事休說 又還是宮燭分煙奈愁裏恩
換時節却把一襟芳思與空階榆莢千萬縷藏鴉細柳
為玉樽起舞回雪想見西出陽關故人初別

白石道人歌曲題云吳都賦戶藏煙浦家具畫船
惟吳興為然春遊之盛西河未能過也已酉歲予
與蕭時甫載酒南遊因遇成歌
張叔夏云情景交鍊得言外意又云白石疎影暗
香揚州慢一萼紅琵琶仙淡黃柳等曲不惟清虛
且又騷雅讀之使人神觀飛越

法曲獻仙音

張彥功
官舍

虛閣籠寒小簾通月暮色偏憐高處樹隔離宮水平馳
道湖山盡入樽俎奈楚客淹留久砧聲帶愁去屢回
顧過秋風未成歸計誰念我重見冷楓紅舞喚起淡妝
人問逋仙今在何許象筆鸞牋甚如今不道秀句怕平
生幽恨化作沙邊煙雨

白石道人歌曲題云張彥功官舍在鐵冶嶺上即
昔之教坊使宅高齋下瞰湖山光景奇絕予數過
之為賦此

念奴嬌

吳興荷花

開紅一舸記來時長與鴛鴦為侶三十六陂人未到水
佩風裳無數翠葉吹涼玉容消酒更洒菰蒲雨嫣然搖
動冷香飛上詩句日暮青蓋亭亭情人不見爭忍淩
波去只恐舞衣寒易落愁入西風南浦高柳垂陰老魚
吹浪留我花間住田田多少幾回沙際歸路

白石道人歌曲題云予客武陵湖北憲治在焉古
城野水喬木參天予與二三友日蕩舟其間意象
幽閒不類人境秋水且涸荷葉出地尋丈因列坐
其下上不見日清風徐來綠雲自動間於疎處窺
見游人畫船亦一樂也竭來吳興數得相羊荷花
中又夜汎西湖光影奇絕故以此句寫之

一萼紅

人日登
定王臺

古城陰有宮梅幾許紅萼未宜簪池面冰膠牆腰雪老
雲意還又沈沈翠藤共閒穿徑竹漸笑語驚起卧沙禽
野老林泉故王臺榭呼喚登臨南去北來何事蕩湘
雲楚水極目傷心朱戶黏雞金盤簇燕空歎時序侵尋
記曾共西樓雅集想垂柳還裊萬絲金待得歸鞭到時
只怕春深

白石道人歌曲題云丙午人日余客長沙別駕之
觀政堂堂下曲沼西負古垣有盧橘幽篁一徑深

曲徑穿而南官梅數十株如椒如菽或紅破白露
枝影扶疎著履蒼苔細石間野興橫生亟命駕登
定王臺亂湘流入麓山湘雲低昂湘波容與興盡
悲來醉吟成調

方輿勝覽云定王臺在潭州俗傳漢長沙定王載
米博長安土築臺於此以望其母唐姬張安國名
曰定王臺
自為書扁

齊天樂

蟋蟀

庾郎先自吟愁賦淒淒更聞私語露濕銅鋪苔侵石井
都是曾聽伊處哀音似訴正思婦無眠起尋機杼曲曲
屏山夜涼獨自甚情緒西窗又吹暗雨為誰頻斷續

相和砧杵候館迎秋離宮弔月別有傷心無數幽詩漫
與笑籬落呼燈世間兒女寫入琴絲一聲聲更苦

白石道人歌曲題云丙辰歲與張功父會飲張達
可之堂聞屋壁間蟋蟀有聲功父約予同賦以授
歌者功父先成詞甚美予褰衷茉莉花間仰見秋
月頓起幽思尋亦得此蟋蟀中都呼為促織善鬪
好事者或以二三十萬錢致一枚鏤象齒為樓觀
以貯之又自注云宣政間有士大夫製蟋蟀吟
張叔夏云全章皆精粹所咏瞭然在目且不留滯
於物

淡黃柳

客舍肥

空城曉角吹入垂楊陌馬上單衣寒惻惻看盡鴛黃嫩

綠都是江南舊相識
正岑寂明朝又寒食
強攜酒小橋宅
怕梨花落盡成秋色
燕燕飛來問春何在
惟有池塘自碧

小重山

湘梅

人繞湘臯月墜時
斜橫花自小
浸愁漪
一春幽事有誰知
東風冷香遠
茜裙歸
鷗去昔遊非
遙憐花可可
夢依依
九疑雲杳斷魂啼
相思血都沁
綠筠枝

樓鑰攻媿集云潘端叔惠紅梅一本全體皆江梅也香亦如之但色紅爾來自湖湘非他種比自此

當稱為紅江梅以別之王文公蘇文忠石曼卿諸公有紅梅詩意其皆未見此種也

點絳脣

松江

燕雁無心太湖西畔隨雲去數峰清苦商畧黃昏雨

第四橋邊擬共天隨住今何許凭闌懷古殘柳參差舞

白石道人歌曲題云丁未冬過吳江作

吳郡志云松江在郡南四十五里禹貢三江之一也南與太湖接吳江縣在江濱垂虹跨其上天下絕景也

惜紅衣

吳興荷花無射宮

枕簟邀涼琴書換日睡餘無力細灑冰泉并刀破甘碧

牆頭喚酒誰問訊城南詩客岑寂高柳晚蟬說西風消
息虹梁水陌魚浪吹香紅衣半狼籍維舟試望故國
渺天北可惜柳邊沙外不共美人游歷問甚時同賦三

十六陂秋色

白石道人歌曲題云吳興號水晶宮荷花盛麗陳
簡齋云今年何以報君恩一路荷花相送到青墩
亦可見矣丁未之夏余游千巖數往來紅香中自
度此曲以無射宮歌之

詞旨屬對虛閣籠寒小簾通月池面冰膠牆腰雪
老翠葉吹涼玉容銷酒

警句千樹壓西湖寒碧暗香波心蕩冷月無聲揚
州慢牆頭喚酒誰問訊城南詩客岑寂高柳晚蟬

說西風消息

惜紅衣問甚時重賦三十六陂秋色

念奴嬌

劉後村詩話姜堯章有平聲滿江紅自叙云滿江紅舊詞用仄韻多不協律如無心撲歌者將心字融入去聲方諧音律予欲以平韻為之久不能成因汎巢湖祝曰得一夕風當以平韻滿江紅為神姥壽言訖風與帆俱駛頃刻而成末句聞珮環則協律矣其詞云仙姥來時正一望千頃翠瀾旌旗與亂雲俱下依約前山命駕羣龍金作軛相從諸娣玉為冠廟中列坐如夫人者十五人向夜深風定悄無人聞珮環神奇處君試看莫淮右阻江南遣六丁雷電別守東關應笑英雄無好手一篙春水走曹瞞又怎知人在小紅樓簾影間此闌甚佳惜無人能歌之者澄懷錄云姜堯章云余別石湖歸吳興雪後過垂虹賦詩云笠澤茫茫雁影微玉峯重疊護雲

衣長橋寂寞春寒夜只有詩人一舸歸後五年
冬復與俞商卿張平甫銛朴翁自封禺同載詣
梁溪道經吳淞山寒天迴雲浪四合中夕相呼
步垂虹星斗下垂錯雜漁火朔風凜凜卮酒不
能支朴翁以衾自經猶相與行吟因賦慶宮春
云雙槳蓴波一蓑松雨暮愁漸滿空濶呼我盟
鷗翩翩欲下背人還過木末那回歸去蕩雲雪
孤舟夜發傷心重見依約眉山黛痕低壓采香
徑裏春寒老子婆娑自歌誰答垂虹西望飄然
引去此興平生難遏酒醒波遠正凝想明璫素
鞵如今安在唯有闌干伴人一霎
者舊續聞姜堯章嘗寓吳興張仲遠家仲遠屢
出外其室人知書賓客通問必先窺來札性頗
如堯章戲作百宜嬌以遺仲遠云看垂楊連苑
杜若吹沙愁損未歸眼信馬青樓去垂簾下娉
婷人妙飛燕翠尊共歎聽豔歌郎意先感便攜

手月地雲階裏愛良夜微煖無限風流疎散有
暗藏弓履偷寄香翰明日聞津鼓湘江上催人
還解春纜亂紅萬點悵斷魂煙水遙遠又爭似
相攜乘一舸鎮長見仲遠歸竟莫能辨則受其
指爪損面至不能出外云
開慶四明續志吳潛暗香疎影二詞序云猶記
己卯庚辰之間初識堯章于維揚至己丑嘉興
再會自此契濶聞堯章死西湖嘗助諸丈為殯
之今又不知幾年矣自昭忽錄示堯章暗香疎
影二詞因信手酬酢并賡潘德久之詩云雪來
比色對淡然一笑休喧笙笛莫怪廣平鐵石心
腸為伊折偏是三花兩葉消萬古才人騷筆尚
記得醉卧東園天幕地為席回首往事寂正雨
時霧昏萬種愁積錦江路悄媒聘音沈兩空憶
終是茅簷竹戶難指望凌煙金碧憔悴了莨菪
裏怨誰始得右暗香佳人步玉待月來弄影天

挂參宿冷透屏幃清入肌膚風敲又聽簷竹前
村不管深雪閉猶自繞枝南枝北算平生此段
幽竒占壓百花曾獨閒想羅浮舊恨有人正醉
裏蛛翠蛾綠夢斷魂驚幾許淒涼却是千林梅
屋雞聲野渡溪橋滑又角引戍樓悲曲怎得知
清足亭邊自在杖藜中幅自注云梅聖俞詩云
十分清意足余別墅有
梅亭扁曰清足右疎影

劉仙倫

仙倫一名儼字叔擬號招山廬陵人有招山小集
一卷

江神子

東風吹夢落巫山整雲鬟却霜紈雪貌冰膚曾共控雙

鸞吹罷玉簫香霧溼殘月墜亂峰寒
解璫回首憶前歡見無緣恨無端
憔悴蕭郎贏得帶圍寬紅葉不傳天
上信空流水到人間

菩薩蠻

效唐人
閨怨

吹簫人去行雲杳香篝繡被都閒了
疊損縷金衣伊家渾不知
冷煙寒食夜淡月梨花下
猶有軟心腸為他燒夜香

蝶戀花

小立東風誰共語
碧盡行雲依約蘭皋暮
誰問離懷知幾許
一溪流水和煙雨
媚蕩楊花無著處
纔伴春來忙底隨春去
只恐遊蜂粘得住
斜陽芳草江頭路

一剪梅

唱到陽關第四聲
香帶輕分羅帶輕
分杏花時節雨紛紛
山繞孤村水繞孤村
更沒心情共酒樽
春衫香滿空有啼痕
一般離思兩銷魂
馬上黃昏樓上黃昏

霜天曉角

倚空絕壁直下江千尺天際兩蛾凝黛愁與恨幾時極
暮潮風正急酒醒聞塞笛試問謫仙何處青山外遠
煙碧

方輿勝覽云天門山在當塗縣西南三十里又名
蛾眉山夾大江東曰博望西曰梁山蛾眉亭在采
石山上望見天門山壁間有詩曰中分黛色三十
尺不著人間一點愁

詞旨警句一一般離思兩銷魂馬上黃昏樓上黃昏
一剪梅

孫惟信

惟信字季蕃號花翁開封人在江湖頗有標致多
見前輩多聞舊事善雅談長短句尤工嘗有官棄

去不仕有花翁集一卷

沈伯時云孫花翁有好詞亦善運意但雅正中時

有一二

市井語

畫錦堂

薄袖禁寒輕妝媚晚落梅庭院春妍映戶盈盈回倩笑
整花鈿柳裁雲剪腰支小鳳盤鴉聳髻鬟偏東風裏香
步翠搖藍橋那日因緣嬋娟流慧眄渾當了恩恩密
愛深憐夢過欄杆猶認冷月鞦韆杏梢空闌相思眼燕
翎難繫斷腸牋銀屏下爭信有人真個病也天天

夜合花

風葉敲窗露蛩吟
楚謝娘庭院秋宵鳳屏半掩
釵花映燭紅搖潤
玉暖膩雲嬌染芳情香透鮫綃
斷魂留夢煙迷楚驛月冷藍橋
誰念賣藥文簫望仙城路杳鶯燕
迢迢羅衫暗摺蘭痕粉迹都銷
流水遠亂花飄苦相思寬盡香腰
幾時重恁玉驄過處小袖輕招

燭影搖紅

一朶鞋紅寶釵壓髻
東風溜年時也是牡丹時
相見花

邊酒初試夾紗半袖與花枝盈盈鬪秀對花臨景為景
牽情因花感舊題葉無憑曲溝流水空回首夢雲不
到小山屏真個歡難偶別後知他安否軟紅街清明還
又絮飛春盡天遠書沈日長人瘦

醉思凡

吹簫跨鸞香銷夜闌杏花樓上春殘繡羅衾半閒衣
寬帶寬千山萬山斷腸十二闌干更斜陽暮寒

南鄉子

壁月小紅樓聽得吹簫憶舊遊霜冷闌干天似水揚州
薄倖聲名總是愁塵暗鷓鴣裘裁剪曾勞玉指柔一
夢覺來三十載風流空對梅花白了頭

詞旨屬對薄袖禁寒輕妝媚晚
警句絮飛春盡天遠書沈日長人瘦燭影搖紅

劉後村孫花翁墓誌李蕃貴開封曾祖昇祖可
父顯武爵季蕃少受祖澤調監當不樂棄去始
婚於婺後去婺游留蘇杭最久一榻之外無長
物躬爨而食書無乞米之帖文無逐貧之賦終
其身如此名重江浙公卿間聞花翁至爭倒屣
所談非山水風月一不挂口長身縵袍意度疎
曠見者疑為俠客異人其倚聲度曲公瑾之妙
散髮橫笛野王之逸奮袖起舞越石之壯也

史達祖

達祖字邦卿號梅溪汴人有梅溪詞一卷四朝聞見錄韓侂胄為平章專倚省吏史達祖奉行文字擬帖擬旨俱出其手侍從東札至用申呈韓敗遂黜焉

姜堯章云奇秀清逸有李長吉之韻蓋能融情景於一家會句意於兩得

張功甫云史生之作情詞俱到纖綃泉底去塵眼中
有瓌奇警邁清新閒婉之長而無詭蕩汙淫之失
端可分鑣清真平睨方回

綺羅香

春雨

做冷欺花將煙困柳千里偷催春暮盡日冥迷愁裡欲

飛還住驚粉重蝶宿西園喜泥潤燕歸南浦最妨他佳
約風流鈿車不到杜陵路沈沈江上望極還被春潮
晚急難尋官渡隱約遙峯和淚謝娘眉嫵臨斷岸新綠
生時是落紅帶愁流去記當日門掩梨花剪燈深燕語

雙雙燕

過春社了度簾幙中間去年塵冷差池欲往試入舊巢
相並還相雕梁藻井又軟語商量不定飄然快拂花梢
翠尾分開紅影芳徑芹泥雨潤愛貼地爭飛競誇輕

俊紅樓歸晚看足柳昏花暝應自棲香正穩便忘了天涯芳信愁損玉人日日畫欄獨凭

黃叔暘云形容盡矣又云姜堯章最貴其柳昏花暝之句

夜行船

不剪春衫愁意態過收燈有些寒在小雨空簾無人深巷已早杏花先賣白髮潘郎寬沈帶怕看山憶他眉黛草色拖裙煙光惹鬢常記故園挑菜

東風第一枝

春雪

巧剪蘭心偷粘草甲東風欲障新暖謾疑碧瓦難留信
知暮寒較淺行天入鏡做弄出輕鬆纖軟料故園不捲
重簾悞了乍來雙燕青未了柳回白眼紅不斷杏開
素面舊遊憶著山陰厚盟遂妨上苑寒爐重煖且慢放
春衫針線恐鳳靴挑菜歸來萬一灞橋相見

黃叔賜云結句尤
為姜堯章拈出

又燈
夕

酒館歌雲燈街舞繡笑聲喧似簫鼓太平京國多歡大

酴醾綺羅幾處東風不動照花影一天春聚耀翠光金縷
相交冉冉細吹香霧嗟醉玉少年半度懷豔雪舊家
伴侶閉門明月闌心倚窻小梅索句吟情欲斷念嬌俊
知人無據想袖寒珠絡藏香夜久帶愁歸去

黃鍾喜遷鶯

元宵

月波凝滴望玉壺天近了無塵隔翠眼圈花冰絲織練
黃道寶光相直自憐詩酒瘦難應接許多春色最無賴
是隨香趁燭曾伴狂客蹤跡漫記憶老了杜郎忍聽

東風笛柳院燈疎梅廳雪在誰與細傾春碧舊情拘未
定猶自學當年游歷怕萬一悞玉人夜寒簾隙

張叔夏云不獨措詞精粹
又且見時節風物之感

清商怨

春愁遠春夢亂鳳釵一股輕塵滿江煙白江波碧柳戶
清明燕簾寒食憶憶鶯聲晚簫聲短落花不許春拘
管新相識休相失翠陌吹衣畫橋橫笛得得

蝶戀花

二月東風吹客袂，蘇小門前楊柳如腰細。
蝴蝶識人遊冶地，舊曾來處花開未。
幾夜湖山生夢寐，評泊尋芳，只怕春寒裏。
今歲清明逢一作連上巳，相思先到湔裙水。

玉樓春

社前一
日

遊人等得春晴也，處處旗亭間繫馬。
雨前紅杏尚娉婷，風裏殘梅無顧藉。
忌拈針指還逢社，鬪草羸多裙欲卸。
明朝新燕定歸來，叮囑重簾休放下。

青玉案

蕙花老盡離騷句綠染徧江頭樹日暝酒消聽驟雨青
榆錢小碧苔錢古難買東君住官河不礙遺鞭路被
芳草將愁去多定紅樓簾影暮蘭燈初上夜香初炷猶
自聽鸚鵡

詞旨屬對斷浦沈雲空山挂雨畫裏移舟詩邊就
夢做冷欺花將煙困柳巧剪蘭心偷拈草甲

警句臨斷岸新綠生時是落紅帶愁流去記當日
門掩梨花剪燈深夜語綺羅香愁損玉人日日畫
闌獨凭雙雙燕恐鳳靴挑菜歸來萬一灞橋相見
東風第一枝自憐詩酒瘦難應接許多春色喜還

鶯

詞眼柳昏花暝

梅溪詞水龍吟陪節欲行留別社友云道人越
布單衣興高愛學蘇門嘯有時也伴四佳公子
五陵年少歌裏眠香酒酣喝月壯懷無撓楚江
南每為神州未復闌干靜慵登眺今日征夫在
道敢辭勞風沙短帽休吟稷穗休尋喬木獨憐
遺老同社詩囊小窻針線斷腸秋早看歸來幾
許吳霜染鬢點愁多少按梅溪曾陪使臣至金
故有此詞

高觀國竹屋癡語齊天樂中秋夜懷梅溪云晚
雲知有闌山念澄霄卷開清霽素景中分冰盤
正溢何啻嬋娟千里危闌靜倚正玉兔吹涼翠
觴留醉記約清吟錦袍初喚醉魂起孤光天地
共影浩歌誰與舞淒涼風味古驛煙寒幽垣夢
冷應念秦樓十二歸心對此想斗插天南雁橫
遶水試問姮娥
有愁能為寄

高觀國

觀國字賓王山陰人有竹屋癡語一卷
陳唐卿云竹屋梅溪詞要是不經人道語其妙處

少游美成不及也

張叔夏云竹屋白石夢憲梅溪俱能特立清新之

意刪削靡曼之

詞自成一家

齊天樂

碧雲缺處無多雨愁與去帆俱遠倒葦沙閒枯蘭漱冷
寥落寒江秋晚樓陰縱覽正魂怯清吟病多依黯怕挹
西風袖羅香自去年減風流江左久客舊遊得意處

珠簾曾捲載酒春情吹簫夜約猶憶玉嬌香怨塵棲故
苑歎壁月空檐夢雲飛觀送絕征鴻楚峰煙數點

玉樓春

宮詞

幾雙海燕來金屋春滿離宮三十六春風剪草碧纖纖
春雨浥花紅撲撲衛姬鄭女腰如束齊唱陽關新製
曲曲終移宴起笙簫花下晚寒生翠縠

金人捧露盤

水仙

夢湘雲吟湘月弔湘靈有誰見羅襪塵生凌波步弱背

人羞整六銖輕娉娉裊裊暈嬌黃玉色輕明 香心靜波
心冷琴心怨客心驚怕佩解却返瑤京盃擎清露醉春
蘭友與梅兄暮煙萬頃斷腸是雪冷江清

又梅

念瑤姬翻瑤珮下瑤池冷香夢吹上南枝羅浮路杳憶
曾清晚見仙姿天寒翠袖可憐是倚竹依依 溪痕淺
雪痕凍月痕淡粉痕微江樓怨一笛休吹芳香待寄玉
堂煙驛雨淒迷新愁萬斛為春瘦却怕春知

祝英臺近

一窻寒孤燼冷獨自箇春睡繡被薰香不是舊風味靜
聽滴滴簷聲驚愁攪夢更不管庾郎心碎念芳意一
併十日春風梅花睺憔悴懶做新詞春在可憐裏幾時
挑菜踏青雲沈雨斷盡分付楚天之外

思佳客

剪翠衫兒穩四停最憐一曲鳳簫吟同心羅帕輕藏素
合字香囊半影金春思悄畫窻深誰能拘束少年心

鶯來驚碎風流膽踏動櫻桃葉底鈴

霜天曉角

春雲粉色春水和雲濕試問西湖楊柳東風外幾絲碧
望極連翠陌蘭橈雙槳急欲訪莫愁何處旗亭在畫
橋側

風入松

捲簾日日恨春陰寒食新晴馬蹄只向南山去長橋愛
花柳多情紅外風嬌日暖翠邊水秀山明 杜郎歌酒

過平生到處蓬瀛醉魂不入重城晚穠歡寄桃葉桃根
繡被嫩寒清曉鶯啼喚起春醒

謁金門

煙墅暝隔斷仙源芳徑雨歇花梢魂未醒溼紅如有恨
別後香車誰整怪得畫橋春靜碧漲平湖三十頃歸

雲何處問

詞旨屬對倒葦沙閒枯蘭淑冷
警句愁萬斛為春瘦却怕春知
金人捧露盤驚愁
攪夢更不管庾郎心碎枕寒臺近
詞眼玉嬌香怨

劉鎮

鎮字叔安南海人嘉泰二年進士學者稱為隨如先生有隨如百詠
劉潛夫云麗不至棄新不犯陳周柳辛陸之能庶乎兼之

玉樓春

東山探梅

泠泠水向橋東去漠漠雲歸溪上住疎風淡月有來時
流水行雲無覓處佳人獨立相思苦薄袖欺寒修竹
暮白頭空負雪邊春著意問春春不語

隨如百詠丙戌清明和章質夫韻水龍吟云弄晴臺館收煙候時有燕泥香墜宿醒未解單衣

初試騰騰春思前度桃花去年人面重門深閉
記彩鸞別後青驄歸去長亭路芳塵起十二屏
山遍倚任蒼苔點紅如綴黃昏人靜煖香吹月
一簾花碎芳意婆婆綠陰風雨畫橋煙水笑多
情司馬留春無
計濕青衫淚

張輯

輯字宗瑞號東澤鄱陽人連江太守思順之子有
東澤綺語債二卷

朱湛盧公東澤得詩法於姜堯章世所傳欸乃集
皆以為月下謫仙復作不知其又能詞也其詞皆
以篇末之語
立新名云

疎簾淡月

梧桐雨細漸滴作秋聲被風驚碎潤逼衣篝線裊蕙爐
沈水悠悠歲月天涯醉一分秋一分憔悴紫簫吹斷素
牋恨切夜寒鴻起又何苦淒涼客裏負草堂春綠竹
溪空翠落葉西風吹老幾番塵世從前諳盡江湖味聽
商歌歸興千里露侵宿酒疎簾淡月照人無寐

山漸青

山無情水無情楊柳飛花春雨晴征衫長短亭 擬行
行重行行吟到江南第幾程江南山漸青

謁金門

花半溼睡起一簾晴色千里江南真咫尺醉中歸夢直
前度蘭舟送客雙鯉沈沈消息樓外垂楊如此碧問
春來幾日

念奴嬌

嫩涼生曉怪得今朝湖上秋風無迹古寺桂香山色外
腸斷幽叢金碧驟雨俄來蒼煙不見苔徑孤陰屐繫船
高柳晚蟬嘶破愁寂且約攜酒高歌與鷗相好分坐

漁磯石算只藕花知我意猶把紅芳留客樓閣空濛管
絃清潤一水盈盈隔不如休去月懸良夜千尺

祝英臺近

竹間棋池上字風日共清美誰道春深湘綠漲沙觜更
添楊柳無情恨煙顰雨却不把扁舟偷繫去千里明
日知幾重山後朝幾重水對酒相思爭似且留醉奈何
琴劍息息而今心事在月夜杜鵑聲裡

詞旨警句悠悠歲月天涯醉一分秋一分憔悴
疎簾淡月落葉西風吹老幾番塵世同上露侵宿酒

疎簾淡月照人無寐同上算只藕花知我意猶把紅芳留客念奴嬌

詞眼恨煙聲雨

東澤綺語債馮可遷號予為東仙故賦東仙寓沁園春云東澤先生誰說能詩興到偶然但平生心事落花啼鳥多年盟好白石清泉家近宮亭眼中廬阜九疊屏開雲錦邊出門去且掀髯大笑有釣魚船一絲風裏嬋娟愛月在滄浪上下天更叢書觀徧筆牀靜畫篷牕睡起茶竈疎煙黃鶴來遲丹砂成未何日風流葛稚川人間世聽江湖詩友號我東仙

李石

石字知幾號方舟資陽人乾道中進士以薦任太學博士出為成都倅仕至都官員外郎有方舟集

木蘭花令

轆轤軼軼門前井不道隔窻人睡醒柔絲無力玉琴寒
殘麝徹心金鴨冷一鶯啼破簾櫳靜紅日漸高花轉
影起來情緒寄游絲飛絆翠翹風不定

李咏

花草粹編李知幾臨江仙云煙柳踈踈人悄悄
畫樓風外吹笙倚闌聞喚小紅聲熏香臨欲睡
玉漏已三更坐待不來來又去一方明月中庭
粉牆東畔小橋橫起來花影下扇子撲流螢

咏字子永號蘭澤廬陵人嘗為溧水令與兄洪子
大渾子清弟浙子秀詮子名著李氏華萼集五卷

姪倫
為序

定風波

點點行人趁落暉
搖搖煙艇出漁扉
一路水香流不斷
零亂春潮綠浸野
薔薇
南去北來愁幾許
登臨懷古
欲沾衣
試問越王歌舞地
佳麗只今惟有鷓鴣啼

清平樂

亂雲將雨飛過
鴛鴦浦
人在小樓空翠處
分得一襟離緒
片帆隱隱歸舟
天邊雪捲雲游
今夜夢魂何處
青

山不隔人愁

夷堅志大江富池縣有甘寧將軍廟殿宇雄偉
行舟過之者必具牲醴祇謁李子永嘗自西下
舟次散花洲有神鴉飛立檣竿久之東去即遇
便風晡時抵岸步青蛇激箭而來至舟尾不見
是夕艤泊明日賽神其前大樓七間尤壯偉郡
守周少隱采東坡祠語扁為卷雪子永作詩曰
卷雪樓前萬里江亂峯卓立森旗槍上有甘公
古祠宇節制洪流掌風雨甘公一去踰十年至
今忠氣猶凜然我來再拜攬陳迹斜陽白鳥橫
蒼煙初題梁間時本云英威凜然如有人掣其
肘乃改為忠氣又賦望月水調歌頭云危樓雲
雨上其下水扶天羣山四合飛動寒翠落簷前
盡是秋清闌檻一笑波翻清怨雪陣卷蒼煙炎
暑去無跡清駛久翩翩夜將闌人欲靜月初圓

素娥弄影光射空際綠嬋娟不用濯纓垂釣喚
取龍公仙駕耕此萬瓊田橫笛望中起吾意已
超然及旦移舟神鴉青
蛇送至長風沙而止

鄭

域

俗本作陸域誤

域字中卿號松窓三山人慶元丙辰隨張貴謨使
金有燕谷剽聞二卷記北庭甚詳

昭君怨

梅

道是花來春未道是雪來香異水外一枝斜野人家
冷落竹籬茅舍富貴玉堂瓊榭兩地不同栽一般開

王 燭

嶠字李夷號貴英陳氏書錄解題季夷北海人紹
淳間名士寓居吳興陸務觀與之厚善三子甲田

中皆登科

有北海集

祝英臺近

柳煙濃花露重合是醉時候樓倚花梢長記小垂手誰
教釵燕輕分鏡鸞慵舞是孤負幾番晴晝自別後聞
道花底花前多是兩眉皺又說新來比似舊時瘦須知
兩意常存相逢終有莫謾春光倏慙

夜行船

曲水濺裙三月二馬如龍鈿車如水風颺游絲日烘晴
畫人共海棠俱醉客裏光陰難可意掃芳塵舊遊誰
寄午夢醒來不覺小窻人靜春在賣花聲裏

詞旨警句春在賣
花聲裏夜行船

蔡松年

松年字伯堅從父靖除真定府判官遂為真定人
仕金官至尚書右丞相封衛國公自號蕭閒老人
卒謚文簡工樂府與吳彥高齊
名號吳蔡體有蕭閒公集六卷

鷓鴣天

賞荷

秀樾橫塘十里香水光
晚色靜年芳
燕支膚瘦薰沈水
翡翠盤高走夜光
山黛遠月波長
暮雲秋影照瀟湘
醉魂應逐淩波夢
分付西風此夜涼

王若虛滹南集詩話云蕭閒樂善堂賞荷詞胭脂
膚瘦薰沈水翡翠盤高走夜光世多稱之此句誠
佳然蓮體實肥不宜言瘦予友
彭子升嘗易膩字此似差勝

尉遲盃

紫雲暖恨翠雛珠
樹雙棲晚小花靜院逢迎的的風流
心眼紅潮照玉腕
午香重草綠宮羅淡喜銀屏小語私

分麝月春心一點 華年共有好願何時定妝鬟莫雨
零亂夢似花飛人歸月冷一夜曉山新怨劉郎興尋常
不淺況不似桃花春溪遠覺情隨曉馬東風病酒餘香
相半

歸潛志云蔡丞相伯堅嘗奉使高麗為館妓賦
石州慢云雲海蓬萊風霧鬢鬟不假梳掠仙衣
卷盡霓裳方見宮腰纖弱心期得處世間言語
非真海犀一點通寥廓無物比情濃與無情相
博離索曉來一枕餘香酒病賴花醫却微艷金
尊收拾新愁重酌半帆雲影載得無限關山夢
魂應被梅花覺梅子雨絲絲滿江干樓閣高麗
故事上國使來館中有侍妓蔡之仙衣卷盡霓

裳方見宮腰纖弱不免為人疵議之矣

漳南詩話蕭閒云風頭夢雨吹無跡蓋雨之至
細者若有若無謂之夢田夫野婦皆道之賀方
回有風頭夢雨吹成雪之句又云蕭閒憶恒陽
家山云好在斜川三尺玉公宅前有池可三畝
號小斜川又自鎮陽還兵府贈離筵乞言者云
待人間覓箇無情心緒著多情換此篇有恨別
之意故以情為苦而還羨無情終章言之宜矣
中州樂府蔡松年聲聲慢涼陘寄內云青燕平
野小雨千峯還成暮陘寒色裁剪芸窻憶得伴
人良夕遙憐幾重眉黛恨相逢少於行役梨花
淚正宮衣春瘦曉紅無力應怪浮雲夫婿不解
趁新醅醉眠涼月怨入關山西去又傳消息誰
知倦游心事向年來苦思泉石人未老約閨峯
多占秀碧

韓 嘒

嘒字子耕號蕭閒文獻通
考韓嘒有蕭閒詞一卷

高陽臺

除夕

頻聽銀籤重燃絳蠟年華裊裊驚心
錢舊迎新能消幾刻光陰
老來可慣通宵飲待不眠還怕寒侵
掩清尊多謝梅花伴我微吟
鄰娃已試春妝了更蜂枝簇翠燕
股橫金勾引春風也知芳意難禁
朱顏那有年年好逞艷游羸
取如今恣登臨殘雪樓臺遲日園林

浪淘沙

莫上玉樓看花雨斑斑四垂羅幙護朝寒燕子不知春
去也飛認欄杆回首幾闌山後會應難相逢祇有夢
魂間可奈夢隨春漏短不到江南

又豐樂樓

裙色草初青鴨鴨波輕試花霏雨溼春晴三十六梯人
不到獨喚瑤箏艇子憶逢迎依舊多情朱門只合鎖
娉婷却逐彩鸞歸去路香陌春城

武林舊事云豐樂樓在湧金門外舊為衆樂亭又
改聳翠樓政和中改今名淳祐間趙京尹與憲重
建宏麗為湖山冠又梵月池立秋千梭門植花木
構數亭春時遊人繁盛舊為酒肆後以學館致爭
但為朝紳同年會拜鄉會之地吳夢憲嘗大書所
作鶯啼序於壁一時為人傳誦

詞旨警句試花霏
雨濕春晴浪淘沙

絕妙好詞箋卷二